



Trg mladih 8, Zona 1A, drugi sprat-kat / 76100 Brčko distrikt BiH, tel: 049/490-135, web: www.sukobinteresabd.ba, e-mail: info@sukobinteresabd.ba
Трг младих 8, Зона 1А, други спрат / 76100 Брчко дистрикт БиХ, тел: 049/490-135, веб: www.sukobinteresabd.ba, е-пошта: info@sukobinteresabd.ba

Broj: KSI-09-267/26

Datum: 05.08.2026. godine

Na osnovu člana 25. stav (1) tačka a) i g) i 32. Zakona o sprečavanju sukoba interesa u institucijama Brčko distrikta Bosne i Hercegovine („Službeni glasnik Brčko distrikta Bosne i Hercegovine“ broj: 04/21 i 18/26) i člana 25. stav (2) Poslovnika o radu Komisije za odlučivanje o sukobu interesa, postupajući po anonimnoj prijavi od 27.07.2026. godine, protiv nosioca javne funkcije D. B., predsjednika Skupštine Brčko distrikta BiH radi utvrđivanja sukoba interesa, Komisija za odlučivanje o sukobu interesa, na 156. sjednici održanoj dana 05.08.2026. godine, donosi

ODLUKU

Postupak za odlučivanje o sukobu interesa protiv nosioca javne funkcije D.B., predsjednika Skupštine Brčko distrikt BiH, neće se pokrenuti, obzirom da iz dokumentacije i radnji ne proizilazi da je u postupanju došlo do povrede odredaba Zakona o sprečavanju sukoba interesa u institucijama Brčko distrikta Bosne i Hercegovine, odnosno postojanja sukoba interesa.

Образложење

Dana 27.07.2026. godine Komisija za odlučivanje o sukobu interesa zaprimila je putem e-maila anonimnu prijavu protiv nosioca javne funkcije D. B., predsjednika Skupštine Brčko distrikta BiH. U prijavi se navodi da se ispita službeno putovanje u St. Louis predsjednika Skupštine u vrijeme odigravanja utakmice u istom gradu za vrijeme Mundijala u SAD-u, te da se sukob interesa ogleda u zloupotrebi javnih beneficija, pod plaštom diplomatskih aktivnosti.

Članom 2. tačka a) Zakona o sprečavanju sukoba interesa u institucijama Brčko distrikta BiH propisano je da sukob interesa postoji kada nosilac javne funkcije ima privatni interes koji utiče, može uticati ili se stvara utisak da utiče na obavljanje javne funkcije, a tačka c) navedenog člana Zakona propisuje da je nosilac javne funkcije izabrano ili imenovano lice u organima i institucijama Distrikta, u pravnim licima koje osniva Distrikta i u pravnim licima kojima je povjereno vršenje javnog ovlaštenja i lice koje je imenovano, odnosno na čiji izbor ili imenovanje saglasnost daje Skupština, odnosno Vlada, ukoliko drugim zakonom nije drugačije propisano, dok tačka h) navedenog člana Zakona propisuje da je privatni interes bilo kakva ostvarena ili moguća korist ili pogodnost za nosioca javne funkcije ili s njim povezanog lica.

Uvidom u Registar javnih funkcija i nosilaca javne funkcije, koje vodi Komisija, utvrđeno je da D. B. obavlja funkciju predsjednika Skupštine Brčko distrikta BiH na osnovu

Odluke broj: 01-02-1009/24 od 29.11.2024. godine, te je obavezan postupati u skladu s odredbama Zakona o sprečavanju sukoba interesa u institucijama Brčko distrikta Bosne i Hercegovine.

Dana 27.07.2026. godine u cilju provjere navoda iz prijave da li postoji sukob interesa, Komisija je po službenoj dužnosti uputila dopis Skupštini Brčko distrikta BiH, zahtijevajući dostavu podataka o tome da li je predsjednik Skupštine u vrijeme održavanja utakmice službeno boravio u St. Louisu, u kojem svojstvu, te pravni osnov za putovanje.

Dana 29.07.2026. godine, dopisom broj :02-05-957-K/26 Komisija za odlučivanje o sukobu interesa je obaviještena od strane Skupštine Brčko distrikta BiH da je D. B., predsjednik Skupštine Brčko distrikta BiH boravio u St. Louisu od 08.06.2026. godine do 16.06.2026. godine, te da su avionske karte plaćene od strane Skupštine Brčko distrikta BiH u iznosu od 4.977 KM, a da je smještaj bio organizovan od strane organizatora događaja, pošto je Brčko distrikt BiH imao sa ovim gradom potpisan ugovor o bratimljenju, dnevnice nisu zahtijevane niti isplaćene. Takođe, prema podnesenom izvještaju o obavljenom službenom putovanju i planiranom protokolu, održani su sastanci u World Trade Center i Bank of America sa privrednim subjektima i gradonačelnikom St. Louisa i njenim saradnicima. Dalje je navedeno da Skupština Brčko distrikta BiH nije zvanično obaviještena od strane Međunarodne federacije fudbalskih asocijacija (FIFA) o terminima održavanja utakmica Svjetskog prvenstva, te da ne raspolaže sa tim informacijama.

Takođe, uz ovaj dopis dostavljena je i dokumentacija od strane Skupštine Brčko distrikta BiH o navedenom i to:

- Poziv američke trgovačke komore u BiH od 03.06.2026. godine,
- Odluka o službenom putovanju u inostranstvo, broj: 02.1-13-735-K/26 od 05.06.2026. godine,
- Nalog za službeni put, sa izvještajem o službenom putovanju, broj: 00104 od 05.06.2026. godine,
- Ugovor o vršenju usluga zaključenih između Skupštine Brčko distrikta BiH i Ventura Travel Agency d.o.o. Travnik kao posrednik u prodaji avio karte za St. Louis sa polaskom 08.06.2026. godine, broj:13-002454/24 od 02.06.2026. godine, sa računom/otpremnicom, broj:222-2/2026. godine, na iznos od 2.869 KM,
- Ugovor o vršenju usluga zaključenih između Skupštine Brčko distrikta BiH i Ventura Travel Agency d.o.o. Travnik kao posrednik u prodaji avio karte za St. Louis sa dolaskom 15.06.2026. godine, broj:13-002454/24 od 12.06.2026. godine, sa računom/otpremnicom, broj: 250-2/2026. godine, na iznos od 2.108 KM.

Uvidom u dokumentaciju dostavljenu od strane Skupštine Brčko distrikta BiH, proizilazi da je nosilac javne funkcije D. B., predsjednik Skupštine Brčko distrikta BiH boravio u službenoj posjeti u St. Louisu, sa polaskom dana 08.06.2026. godine i povratkom dana 16.06.2026. godine, na osnovu Odluke o odobravanju službenog putovanja u inostranstvu, broj: 02.1-13-735-K/26 od 05.06.2026. godine, putnog naloga broj: 00104 od 05.06.2026. godine i ugovora o vršenju usluga broj: 13-002454/24 od 02.06.2026. godine i od 12.06.2026. godine. Svrha službenog putovanja je bila networking prijem u St. Louisu, odnosno posjeta grada sa kojim Brčko distrikt BiH ima potpisan sporazum o bratimljenju u cilju jačanja saradnje u oblasti sporta, obrazovanja mladih, visokog obrazovanja/nauke i istraživanja, ekonomije, kulture, okoliša, energetike, turizma i zdravstva, a na osnovu poziva Američko-bosanske privredne komore.

Uvidom u javno dostupne podatke na službenoj internet stranici Međunarodne federacije fudbalskih asocijacija (FIFA) utvrđeno je da je reprezentacija Bosne i Hercegovine u okviru predmetnog takmičenja u gradu St. Louisu utakmicu odigrala dana 06.06.2026. godine, potom 12.06.2026. godine u Torontu, 18.06.2026. godine u Los Angelesu, 24.06.2026. godine u Saeattlu, 02.07.2026. godine u San Francisku. Istovremeno, iz dostavljenog dopisa i dokumentacije proizilazi da je službeno putovanje nosioca javne funkcije D. B., predsjednika Skupštine Brčko distrikta BiH trajalo od 08.06.2026. godine do 16.06.2026., odnosno dva dana nakon odigravanja navedene utakmice u St. Louisu, a ne u vrijeme kako je to navedeno u prijavi, te Komisija nije našla povredu Zakona, odnosno sukob interesa u ovom slučaju opisanom u prijavi.

Imajući u vidu sve navedeno, a na osnovu prikupljenih akata, dokumentacije i uvida u iste, jasno je da nosilac javne funkcije D. B., predsjednik Skupštine Brčko distrikta BiH nije povrijedio odredbe Zakona o sprečavanju sukoba interesa u institucijama Brčko distrikta BiH, odnosno da ne postoji sukob interesa, jer nisu utvrđene okolnosti koje bi ukazivale na moguću povredu odredaba Zakona. Slijedom navedenog, Komisija je donijela odluku kao u dispozitivu odluke.

Pouka o pravnom lijeku:

Protiv ove Odluke nije dozvoljena žalba, ali se može pokrenuti upravni spor pred Osnovnim sudom Brčko distrikta Bosne i Hercegovine u roku od 30 dana od dana prijema ove Odluke.

Predsjednik
Komisije za odlučivanje o sukobu interesa

Admira Mujić, dipl. pravnik

Dostaviti:

1. Anonimnom podnosiocu putem oglasne ploče,
2. Internet stranici Komisije,
3. Evidenciji,
4. Arhivi.